

L'Europa spizzicata? Diversità e prospettive di e mobilitazione independentiste ughjinche

Cunferenza prununziata in Rugliano, nant'à l'invitazione di l'associu Cap'in Lingua, u 6 di dicembre di u 2014

Di sicuru, u referendum nant'à l'indipendenza di a Scozia è a mobilitazione catalana pudarianu fà crede à un prucessu di frammentazione di l'Europa. In quelli territorii, c'hè omancu 40% di a popolazione ch'hà vutatu o ch'hè pronta à vutà per l'indipendenza.

Pigliendu un pocu di distanza, si vede ch'un ci simu mancu appena. Ci sò independentismi furtissimi, u scuzzese, u catalanu, u bascu, u fiamingu; più luntanu, quelli di e Feroè è di a Gruinlandia; ancu più luntanu, quellu di a Nova Caledunia... Per u restu, l'indipendentismu ferma una prospettiva à longu andà. In certi lochi, l'idea pò ancu perde i sustegni, cum'è à u Paese di Galle.

Ciò ch'aghju da pruvà à fà quì, ghjè, in un primu tempu, di purtà qualchì spiecazione nant'à i dui casi simbolichi: a Scozia è a Catalogna. In un sicondu tempu, tratteraghju di a quistione di l'effettu di a crisa nant'à a forza di l'idee independentiste, ciò chì m'hà da permette di mette in valore a pluralità di e mobilitazione independentiste. In un terzu tempu, parlaraghju di e prospettive di i movimenti independentisti, chì sò assai diverse è complesse.

Dui casi simbolichi: Scozia è Catalogna

In quellu 2014, s'hè parlatu assai di i casi di a Scozia è di a Catalogna. Ghjè più chè nurmale, vistu chì c'hè statu un referendum nant'à l'indipendenza in Scozia, è chì u putere catalanu hà circatu à urganizà u stessu evenimentu, ma s'hè trovu impeditu da u Statu spagnolu è a so Custituzione. Hè impurtante di dà qualchì precisione nant'à ciò chì s'hè passatu in ssi lochi.

In Scozia, u referendum nant'à l'indipendenza hè statu neguziatu trà i governi nazionali è territoriali dopu à l'elezzioni scuzzese di u 2011, ch'anu datu à i nazionalisti una maggiurità assoluta. U primu dibattitu hà purtatu nant'à a quistione posta. U governu scuzzese era favurevule à trè scelte pussibile: u sistema attuale, l'indipendenza, o un autunumia rinfurzata; postu chì, puru essendu independentistu, a sapia bè ch'ella era assai difficiule di purtà cusì prestu a so ghjente à spiccassi da l'Inglese. Ghjè u Primu ministru brittannicu ch'hà impostu l'alternativa radicale – site à prò o contru l'indipendenza di a Scozia – essendu di sicuru persuasu ch'elli vincerianu i cuntrarri.

Eppuru, a campagna hà mustratu chì e sicurezze sò sempre relative. À l'iniziu, eranu più o menu 30% di l'elettori ch'eranu pronti à sustene l'indipendenza. Duie simane nanz'à u votu, un inchiesta dava a vittoria à l'indipendentisti, ciò ch'hà messu tuttu u Regnu unitu in panicca nera, è purtatu i trè grandi partiti inglesi à prumette assai più autunumia à i scuzzesi s'elli si mantenianu ind'è l'unione. 19 anni nanzi, avianu fattu listessa i partiti canadiani cù successu, postu chì l'indipendenza di u Chebecu era stata ricusata solu da 50,5% di i voti.

Infine, u sì à l'indipendenza di a Scozia hà uttenutu 45%, soprattuttu perchè ùn hè statu capace di cunvince abbastanza donne, ritirati è categorie ricche. Eppuru si pò parlà d'una disfatta pusitiva.

- U paese hà cunnisciutu un gran mumentu di demucrazia, simbulizatu da una partecipazione d'85% di l'elettori, invece ch'eranu solu 50% di vutanti per l'ultime elezzione regiunale.
- Soprattuttu, in dui anni, a campagna per u Sì hè riesciuta à cunvince centi di millaie di Scuzzesi à andà à vutà à prò di l'indipendenza. L'argumentu maiò hè statu di pudè campà megliu cù l'indipendenza, attraversu un mudellu suciale più generosu.
- Infine, sviluppi di l'autunumia ci ne sarà di sicuru, puru sè u putere scuzzese hà digià cumpetenze legislative tamante, à u livellu di l'educazione, di u suciale, di a salute, etc.

U casu catalanu hè assai sfarente, postu ch'un c'hè accordu cù u Statu per urganizà un referendum nant'à l'indipendenza, è chì, secondu a Custituzione, u Statu hè solu cumpetente in materia di referendum. U putere catalanu hà circatu quantunque à lancià quellu prucessu. In un primu tempu, s'hè decisu ch'ellu si puneria una doppia quistione: "vulete chì a Catalogna sia un Statu?", "in casu di risposta pusitiva, vulete chì quellu Statu sia indipendente?" Di tal modu, si lasciava un spaziu puliticu à quelli – belli numerosi – chì preferiscenu un autunumia rinfurzata à l'indipendenza. In un sicondu tempu, hà parlatu solu d'una cunsultazione, micca d'un referendum decisiunale.

U prublema hè statu l'upposizione tutale di u Governu spagnolu. Quella, prima, hà fattu suspende a cunsultazione da a ghjustizia. Tandù i Catalani anu mantenutu a cunsultazione, ma anu cunfidatu l'urrganizazione à voluntarii è à associi, è l'anu qualificata di "cunsultazione alternativa". Ma hè stata listessa. Secondu u Cunsigliu di Statu, u prublema ùn hè micca a forma, ma u fondu, vale à dì a quistione posta, chì ghjè senza dubbitu cuntraria à a Custituzione spagnola.

U putere catalanu hà mantenutu torna a cunsultazione, ma ùn si pudia aspittà assai partecipazione. Ci pò esse, in Catalogna, una maggiurità di a pupulazione per l'indipendenza, ma a maiò parte a vole fà in u quattru di a legalità. Cusì anu vutatu più di dui milioni è 300 mila Catalani, è trà di elli quasi un milione è 900 mila per l'indipendenza, ciò ch'un hà mancu appena purtatu u putere di Madrid à cambià di pusizione. Per quellu putere, ùn c'hè nunda à discorre nè à cambià: ciò chì pò accade di megliu à i Catalani hè di firmà Spagnoli, è i 66% d'astensione sò a prova chì l'independentisti ùn sò micca cusì forti.

Da a parte catalana, hè quasi sicura ch'ellu seranu cunvocate prestu nove elezzione regiunale, ma c'hè un incertezza nant'à a strategia naziunalista. L'attuale presidente, ch'è no' puderiamu qualificà d'independentistu moderatu, teme di fassi supranà da i più radicali, è prupone dunque una lista unica di l'independentisti, cù un solu prugramma – l'indipendenza è a redazione d'una Custituzione per a Catalogna.

Cusì l'elezzione puderia piglià una forma plebiscitaria, per o contru l'indipendenza. Eppure, l'altru grande partitu naziunalistu, ch'hè in testa di l'inchieste d'upinione, ùn hè tantu dispostu ad abbraccià sta via quì. Ma soprattuttu, pare bellu difficiule chì l'indipendenza di a Catalogna possi esse dichjarata è operata di manera unilaterale. Puru in casu di vittoria sprupusitata à quelle elezzione, u Statu puderia mantene e so pusizione.

Siamu sicuri chì l'attuale Governu spagnolu preferisce mille volte abbandunà per sempre u putere, piuttosto ch'è di lascià a Catalogna gode di l'indipendenza, o ancu d'un autunumia bella allargata. Dunque, c'hè un ubligazione di cunsiderà ciò chì si passa à u livellu naziunale. In Spagna, hè quasi sicura ch'è a dritta perderà l'elezzione l'annu prossimu, è ch'è i grandi partiti di manca sò favorevuli à una mudificazione glubale di a Custituzione, ciò ch'è puderia permette d'accresce assai l'autunumia catalana. U prublema hè ch'è i dui partiti di manca sò assai assai sfarenti, è ch'un hè manc'appa sicura ch'elli rieschinu à governà insemi.

Crisa economica è diversità di l'indipendentismi

L'effettu u più chjaru di a crisa economica attuale è a falata di i partiti duminanti, è a crescita di i partiti chì cuntestanu di modu radicale u sistema puliticu.

Si vede in Italia, attraversu u *Movimento 5 Stelle*, di u comicu Beppe Grillo, ch'hà francatu 20% di i voti à e legislative, senza un prugrama veramente chjaru, aldilà di a dinunzia di i pulitici, di u Statu, di l'Europa... è ancu di l'immigrati.

Si vede in Spagna, cù *Podemos*, chì si pò definisce facilmente cum'è un movimentu di manca alternativa, chì vurria lampà in mare a Custituzione di u 78, è chì secondu l'inchieste, puderia diventà u primu partitu di u paese l'annu chì vene.

Si vede in Inghilterra è in Francia, attraversu l'UKIP è u FN, chì sò partiti più tradiziunali di dritta radicale, per ùn di di strema dritta. Di manera generale, sò quessi partiti quì ch'anu appruffittatu u megliu di a crisa di i partiti duminanti.

Eppò, ind'è i territorii specifichi, d'un puntu di vista culturale o geograficu, s'hè vista a prugressione tremenda di certi partiti naziunalisti, in particolare in Scozia è in Catalogna, induve a quistione di l'indipendenza hè posta di manera più chè chjara.

Quantunque, hè megliu à ùn fà troppu generalità. Parechje sò e regione induve ùn si vede prugressi sinsibuli di i naziunalisti è l'indipendentisti. Prugressi ùn si ne vede in Sardegna, Sicilia, Galizia, Baleari, Paese di Galle, Irlanda di u Nordu, ecc. Ind'altri lochi, l'influenza di i partiti naziunalisti è indipendentisti cresce di sicuru, sia à u livellu elettorale, sia à u livellu ideologicu – ghjè u casu di a Corsica o di u Sud-Tirol –, ma per avà i Stati cuncernati ùn sò mancu appena disposti à cambiamenti istituzionali sinsibuli, vale à di un autunumia rinfurzata.

Dimu piuttosto chì i fattori congiunturali anu avutu un effettu decisivu in Scozia è Catalogna, perchè chì c'era digià una mobilitazione independentista assai putente, è perchè quella mobilitazione s'hè truvata di pettu à governi cunservatori chì l'anu scatinata. Allora, iè, pudemu di chì a crisa economica è pulitica hà aiutatu l'indipendentisti scuzzesi è catalani à francà un passu decisivu, ma ùn si pò esagerà u so propiu impattu.

Di manera più generale, hè impurtante à di chì l'indipendentismi, ancu s'elli anu u listessu scopu, sò assai assai sfarenti. Da una parte, sè no' guardemu i so pruggetti pulitichi. Per esempiu, i Scuzzesi anu un pruggettu bellu inclusivu, chì si pò di di manca, puntellatu nant'à u sintimu naziunale ma micca nant'à una lingua particolare. Invece, in Flandra, u pruggettu independentistu hè di dritta, per ùn di di strema dritta, è ci si pò vede assai prucessi d'esclusione per mutivi linguistici.

Da una altra parte, sè no cunsideremu l'attitudine di i Stati. Per certi, cum'è a Catalogna, a porta hè chjosa, è sarà bella difficile da apre, cù u risicu ch'elle si sviluppinu e tensione suciale. Per d'altri, cum'è i Feroè, a porta hè aparta, cumpletamente aparta. D'altronde, quindici anni fà, u governu territoriale avia lancià un veru prucessu independentistu, ma l'hà abbandunatu perchè u Danimarcu hà ricusatu d'accompagnà stu prucessu durante quindici anni cum'è avianu dumandatu. Sin'à quattru anni s'è eranu disposti à aiutà, ma quindici anni nò. Tuttu què per di chì u scopu di l'indipendenza, ch'ellu sia spartutu o nò, raprisenta quantunque – è in igna locu - una sfida tamanta.

Sbuccà infine?

L'esperienza ci dice chì sbuccà nant'à l'indipendenza hè d'una difficoltà tremenda. Guardendu cinquant'anni in daretu, ci si pò dumandà sè l'indipendenza hè solu un affare pè i paesi povari. Pigliemu l'ultimi paesi diventati indipendenti: u Sud Soudan, u Timor Orientale, u Montenegro, ecc. U paese u più riccu diventatu indipendente st'ultimi decenii hè stata a Republica Cecca, chì s'hè spiccata da a Sluacchia di modu assai consensuale.

Ma ci pudemu dumandà perchè... soprattutto per territorii tali a Catalogna, u Paese bascu o a Scozia:

- induve l'attaccamentu à u Statu nazione hè sprufundatu,
- chì sò ricchi,
- ch'anu digià un autunumia tamanta,
- è forse soprattutto induve a classa pulitica è l'amministrazione territoriale anu dimustratu ch'elle eranu ancu capace di gestisce megliu chè u Statu...

Eppuru una grande parte di a pupulazione dubbiteghja sempre di pettu à a suluzione a più radicale, è tandu a quistione hè di sapè s'ella deve stunà. Da una parte, i seculi di storia cumuna lascianu quantunque qualchì traccia.

Vidimu chì, malgradu a crescita impressiunante di l'indipendentismu in Catalogna, c'hè sempre una parte assai maggiuritaria di a pupulazione, 64% secondu l'ultima inchiesta, chì si sente più o menu spagnola. Da un'altra parte, è soprattutto, esiste di sicuru una paura di u risicu, una paura di perde troppu di pettu à ciò chì si vince.

Territorii cum'è u Paese bascu è a Scozia, a u livellu finanziariu, sò trattati bè da i Stati spagnolu è britannicu. Da u 78, u Paese bascu hà un sistema fiscale più favorevule cà quellu di l'altre regione spagnole, for'di a Navarra ch'hè ancu più favorizata. Cusì a so capacità di spesa per abitante hè in generale di 10 à 20% più alta cà a media. In quantu à u secondu, sin'ad avà ùn avia quasi micca puteri fiscali, ma ghjè u Statu britannicu ch'hà salvatu e so grande banche di a bancarotta. Si pò ancu dì chì e so dutazione l'anu permessa di mantene pulitiche assai più generose. Per esempiu, i costi di scrizione à l'Università sò firmati i listessi, mentre ch'in Inghilterra l'anu moltiplicati per trè.

L'effettu u più sicuru di e mobilitazione independentiste ughjinche hè d'influenzà l'altri partiti, regionali è naziunali, di modu à accelerà u sviluppu di i puteri regionali. L'esempiu di a Scozia hè chjaru: ghjustu nanzi à u votu nant'à l'indipendenza, i trè grandi partiti inglesi anu prumessu prestu prestu un bellu sviluppu di i puteri fiscali scuzzesi... è c'hè digià una parte impurtante di l'impositu nant'à u rivenutu ch'hè stata trasferita à l'Assemblea di Scozia. Di sicura, l'indipendentisti aspittavanu è aspettanu di più, ma hè di difficiule di minimizà stu tippu di riforme.

Bisogna dinò à riflette sin'à induve si pò andà ind'è l'autunumia. Territorii cum'è i Feroè è a Gruinlandia sò piccule sucetà à parte di u Danimarcu, sia geugrafficamente, sia puliticamente, sia ecunomicamente, ecc. Intantu, ùn hè troppu difficiule per u Statu di lascialli tutta l'autunumia ch'elli volenu, soprattutto chì finzanu da per elli e so cumpetenze. D'altronde, u Danimarcu ricunosce dapoi anni è anni chì quelli dui paesi anu drittu à l'autodeterminazione, è l'indipendenza hè veramente una prospettiva logica.

Ma quandu si tratta di un territoriu cuntinentale, l'affari sò più cumplessi, vistu ch'elli ci sò assai scambii di pupulazione, di prudutti, di servizii, etc. U casu u più tippicu hè quello di a Flandra, induve i naziunalisti volenu ch'ancu a securità suciale sia cumpletamente regiunalizata. Sarianu cusì tocchi i dritti suciali ch'ellu fermeria forse pocu affare di l'unità di a citadinanza naziunale. Eppure, forse ch'in generale, sta forma di suluzione sarà favurizata rispettu à l'indipendenza. Imaginemu ch'in Catalogna u catalanu sia l'unica lingua ufficiale, mi si pare ch' a Spagna firmeria a Spagna. Ma senza a Catalogna, a Spagna saria sempre a Spagna?

Per certi, sta via, ch' si puderia definisce cum'è cunfederale, sumiglierà à u Sacru imperiu di u XVII seculu; per d'altri, sarà l'unica manera di mantene un quattru cumunu è soprattuttu una certa cuesione suciale. Perchè e secessione ùn sò micca solu istituziunale. Ci sò e secessione nascoste, quelle ch' portenu e tensione e più pessime, per ùn di l'odiu, trà gruppi suciali o culturali. È forse ch'ellu hè sempre megliu à cambià l'istituzioni chè di lascià sviluppassi l'odiu trà a ghjente.

Andria Fazi